

आकाशवाणी

खबरां पूजा वजीर कोला

1. साबका प्रधानमंत्री डाक्टर मनमोहन सिंह हुंदा जंदी रातीं काल होई गेआ ऐ। राष्ट्रपति द्रौपदी मुर्मु, उपराष्ट्रपति जगदीप धनखड़, प्रधानमंत्री नरेन्द्र मोदी ते होरनें नेताएं सने समूलचा राष्ट्र मनमोहन सिंह हुंदे काल पर सोग मना करदा ऐ।

2. डाक्टर मनमोहन सिंह हुंदा काल होई जाने पर सरकारै 7एं दिनें दे राश्ट्री सोग दा ऐलान कीता ऐ।

3. केंद्री गृह ते सहकारिता मंत्री अमित शाह होरें आखेआ ऐ जे ऐसे बीएं दे उत्पादन बक्खी मता ध्यान देना चाहिदा जिंदे च घट्ट पानी ते घट्टोघट्ट कीटनाशकें दी लोड़ होऐ।

4. भारत दे बैंकें दा लाह उप्परोतली 6में ब' रे 2023-24 च बी बधेआ ऐ।

5. भारत ते अस्ट्रेलिया बश्कार 5 टेस्ट मैचें दी बार्डर-गावस्कर श्रृंखला दे मैलबोर्न च खेड्ढे जा करदे चौथे टेस्ट मैच दे अज्ज दुए ध्याड़े अस्ट्रेलिया नै अपनी पैहली पारी च 474 रन्ज बनाए न।

Manmohan Singh

साबका प्रधानमंत्री डॉ. मनमोजन सिंह हुंदा पिछली रातीं नमीं दिल्ली च काल होई गेआ। ओह् 92 बरें दे हे। डॉ. सिंह होरें अखीरी साह् दिल्ली दे एम्स अस्पताल च लैता। कल मते बिमार होने करी उनेंगी रातीं 8 बजे एम्स दे एमरजेंसी वार्ड च भर्ती करवाया गेआ हा। एम्स पासेआ जारी बुलेटिन मूजब सारी कोशिशें दे बावजूद उंदी हालत च सुधार नेई होआ ते 9 बज्जिये 51 मिंटे पर उंदी मौत दी पुष्टि करी दिती गई। पिछले किश म्हीनें थमां मनमोहन सिंह हुंदी सेहत खराब चलारदी ही। साबका प्रधानमंत्री पी.वी नरसिम्हा राव हुंदे कार्यकाल च डॉ. सिंह होर वित्त मंत्री हे जिनेंगी 1991 दे आर्थिक सुधारें दा निर्माता आखेआ जंदा ऐ। कांग्रेस दी यूपीए सरकार च डॉ. मनमोहन सिंह 2 बारी प्रधानमंत्री बने। डॉ. मनमोहन सिंह हुंदा जन्म 26 सितंबर 1932 गी होआ हा ते ओह् भारत दे 13में प्रधानमंत्री बने।

<><><><><><><><>

Condolences-Messages

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें साबका प्रधानमंत्री डॉ. मनमोहन सिंह हुंदे काल पर दुख जताया ऐ। अपने स्नेह च राष्ट्रपति होरें आखेआ ऐ जे डॉ. मनमोहन सिंह होर ऐसे बिरले राजनीतिज्ञ हे जिंदी शिक्षा ते प्रशासन दी दुनिया च बरोबरी दी महत्वपूर्ण पंछान ही। उनें आखेआ जे भारती अर्थ बवस्था च सुधार आस्तै डॉ. सिंह होरें अहम ओहदें पर

रेडये बड़ा योगदान दितता। उपराश्ट्रपति जगदीप धनखड़ होंरे आखेआ जे साबका प्रधानमंत्री डॉ. मनमोहन सिंह होर इक मन्ने दे अर्थ शास्त्री हे जिनें भारतीय अर्थ बवस्था च बड़ा मता सुधार कीता। अपने स्नेय च प्रधानमंत्री नरेंद्र मोदी होंरे डॉ. मनमोहन सिंह हुंदे काल पर दुख जतांदे होई आखेआ जे भारत दे वित्त मंत्री दे तौर पर उंदी तरफा कीते गेदे महत्वपूर्ण कम्मं दी छाप केई बरें तोड़ी भारती आर्थिक नीति पर पाई गेई। गृह मंत्री अमित शाह, केंद्री मंत्री ते बीजेपी अध्यक्ष जे.पी नड्डा ते अश्विनी वैशणव होंरे बी साबका प्रधानमंत्री हुंदे काल पर शोक जताया ते आखेआ जे डॉ. मनमोहन सिंह हुंदा नीमापन ते कर्मठता म्हेशा चेता कीती जाग। कांग्रेस अध्यक्ष मल्लिकार्जुन खड़गे, लोकसभा च विपक्ष दे नेता राहुल गांधी ते बिहार दे मुखमंत्री नीतिश कुमार होंरे डॉ. मनमोहन सिं हुंदी मौत गी भारतीय राजनीति आस्तै बड़ा नुकसान दस्सेआ।

<><><><><><>

Nationnal Mourning

सरकार नै साबका प्रधानमंत्री डॉ. मनमोहन सिंह हुंदे काल मगरा उंदे सम्मान च 7 दिनें दे राजकीय शोक दी घोषणा कीती ऐ। इस दौरान राश्ट्री झंडा पूरे देश च अद्दा झुके दा रौहग ते कोई बी सरकारी मनोरंजक कार्यक्रम दा आयोजन नेई कीता जाग। डॉ. सिंह हुंदा खीरी संस्कार राजकीय सम्मान कन्नै कीता जाग। डॉ. मनमोहन सिंह हुंदे खीरी संस्कार आहले दिन भारतीय दूतावास दे सारे

दफ्तरें च राष्ट्रीय झंडा अद्दा झुके दा रौहगा। डॉ. मनमोहन सिंह होरें गी श्रद्धांजलि देने आस्तै अज्ज केंद्री मंत्रीमंडल दी बैठक लग्गोग।

<><><><><><>

Jaishankar

विदेश मंत्री एस. जयशंकर होर अमरीका दे राष्ट्रीय सुरक्षा सलाहकार जेक सुलिवान हुंदे कन्नै वाशिंगटन डी.सी च पिछली रातीं मिले। दौनें नेताएं भारत-अमरीका बश्कार रणनीकि सांझेदारी च होए दे विकास पर तफसीली चर्चा कीती ते मौजूदा खेत्तीय ते वैश्विक मुद्दें पर विचार सांझा कीते। डॉ. जयशंकर होर 24 दिसंबर थमां अमरीका दे 6 रोजा दौरें पर न। भारतीय विदेश मंत्री अमरीका दे विदेश मंत्री हुंदे कन्नै मिलिए अहम दपक्खी, खेत्तीय ते अंतरराष्ट्रीय मुद्दें पर चर्चा करंगन।

<><><><><><>

Rashtriya-Bal Puraskar

राष्ट्रपति द्रोपदी मुर्मू होरें कल नर्मी दिल्ली च 17 बच्चें गी उंदी असाधारण उपलब्धिं आस्तै प्रधानमंत्री राष्ट्री बाल पुरस्कार कन्नै सम्मानित कीता। एह पुरस्कार 7 श्रेणिं च दिते जंदे न जियां कला ते संस्कृति, वीरता, मियां काहडां, विज्ञान ते तकनीक, समाजवेवा, खेड्ठ ते पर्यावरण दे खेत्तर शामिल न। 14 राज्यें ते केंद्र शासित प्रदेश थमां इनें जेतुं गी 1 तगमा, प्रमाण पत्र ते

प्रशस्ति पत्रिका भेंट कीती गई। प्रधानमंत्री नरेंद्र मोदी ते महिला ते बाल विकास मंत्री अन्नपूर्णा देवी हारें इनें जेतुएं कन्नै गल्लबात बी कीती।

<><><><><><><><>

Amit Shah BBSSL

केंद्री गृह ते सहकारिता मंत्री अमित शाह हारें आखेआ ऐ जे बीएं सरबंधी भारती सहकारी समिति लिमिटेड (बीबीएसएसएल) गी ऐसे बीएं दे उत्पादन पर मता ध्यान देना चाहिद जिंदे च घट्ट पानी ते घट्टोघट्ट कीटनाशकें दी लोड़ होऐ। नमीं दिल्ली च बीबीएसएसएल दी समीक्षा बैठक दी अध्यक्षता करदे होई उनें आखेआ जे लौहके करसानें गी बद्धोबद्ध संभव उपज हासल करने दे जतन जकीनी बनाने लोड़चदे न। गृह मंत्री हारें आखेआ ऐ जे प्रधानमंत्री नरेन्द्र मोदी हुंदे “सहकार थमां समृद्धि“ दे नजरिये गी साकार करने ते करसानें गी सशक्त बनाने च बीबीएसएसएल दी महत्वै आहली भूमिका ऐ। उनें बीबीएसएसएल गी भारत दे पारंपरिक बीएं दे संग्रहण ते संरक्षण पर ध्यान केंद्रित करने दा आहवान कीता। श्री शाह हारें समिति लेई बरें 2025-26 तगर 20 जहार बादू सहकारी समितियें कन्नै जुड़ने दा लक्ष्य रक्खेआ। गृह मंत्री हारें आखेआ जे बीबीएसएसएल भारत दे पारंपरिक रूप कन्नै पौष्टिक बीएं दे संग्रह ते संरक्षण दी दिशा च तेजी कन्नै कम्म करै करदा ऐ।

<><><><><><><><>

RBI

भारत दे बैंकें दा लाह उप्परोतली 6में ब'रे 2023-24 च बी बधेआ ऐ। बैंकें दे डुब्बी गेदे दोआर-कर्जे यानि एनपीए घटियै 13एं ब'रें दे हेठले स्तर 2 इशारिया 7 फीसद पर आई गया ऐ। भारती रिजर्व बैंक दी रिपोर्ट मूजब भारत दे बैंकें दी माली स्थिति मजबूत बनी दी ऐ ते एह बैंकें दे दोआर ते जमा च लगातार बाद्दे थमां बी उजागर होंदा ऐ। भारत दे मैक्रो फंडामेंटल्स नै बैंकिंग ते गैर-बैंकिंग माली खेत्तरें दे प्रदर्शन कन्नै मजबूती गी बढ़ावा दिता ऐ। बैंकें दी जीएनपीए दा अनुपात मार्च 2024 दे अखीरै च 13 ब'रें च सब्बनै शा घट्ट 2 इशारिया 7 फीसद ते सितंबर 2024 दे अखीरै च 2 इशारिया 5 फीसद पर आई गोआ। रिजर्व बैंक दे मताबक बैंकें दी पूंजी सरबंधी स्थिति संदोखै आहली ऐ। सितंबर दे अखीरै तगर बैंकें दे कुल दोआर च शुद्ध फसे दे दोआर-कर्जे दी हिस्सेदारी घट्ट होइयै सिफर इशारिया 5-7 फीसद होई गई जदके एह मार्च दे अखीरै च सिफर इशारिया 6-2 फीसद ही। गैर बैंकिंग माली कंपनियें एनबीएफसी दी संपत्ति गुणवत्ता ब'रे 2023-24 च सुधरी ते उंदे बेई-खातें च 2 अंकें दा मजबूत बाद्दा रेया।

<><><><><><><><>

Mann Ki Baat

प्रधानमंत्री नरेन्द्र मोदी अपने माहवार रेडियो कार्यक्रम "मन की बात" दे राएं औंदी 29 दिसम्बर गी देश विदेश च रौहने आहले श्रोताएं कन्नै बचार सांझे

करडन। हर म्हीने दे अखीरले ऐतवारें दिनै 11 बजे प्रसारत होने आले इस कार्यक्रम दी एह 117मीं किशत होग। "मन की बात" दा प्रसारण आकाशवाणी ते दूरदर्शन दे समूलचे नेटवर्क पर कीता जाहग।

<><><><><><>

Cricket

भारत ते अस्ट्रेलिया बश्कार 5 टेस्ट मैचें दी बार्डर-गावस्कर श्रृंखला दे मैलबोर्न च खेड्ढे जा करदे चौथे टेस्ट मैच दे अज्ज दुए ध्याड़े अस्ट्रेलिया नै अपनी पैहली पारी च 474 रन्ज बनाए न। भारती टीम दे खेड्ढारी साबका प्रधानमंत्री डाक्टर मनमोहन सिंह हुंदे सम्मान च अपनी बाहीं पर काली पट्टी बन्नियै एह मैच खेड्ढा करदे न जिंदा जंदी रातीं नमीं दिल्ली च काल होई गोआ ऐ। एहदे शा पैहले अस्ट्रेलिया दी टीम नै कल इस टेस्ट मैच दे पैहले ध्याड़े 6 विकटें दे नुकसान पर 311 रन्ज बनाए। अस्ट्रेलिया दी तरफा पैहली बारी टेस्ट मैच खेड्ढा करदे 19एं बरें दे बल्लेबाज सैम कोन्सटॉस नै शानदार 60 रन्ज बनाइयै अस्ट्रेलिया गी इस मैच च खरी शुरुआत दिती ते स्टीव स्मिथ नै 140 रन्ज बनाइयै मेजबान टीम गी मजबूत स्थिति च पुजाई दिता। 5 टेस्ट मैचें दी एह श्रृंखला फिलहाल 1-1 दी बरोबरी पर ऐ।

<><><><><><>